



Kristian Jeremiassen
Inatsisartunut ilaasortaq, IA
/MAANI

Nunatsinni mittarfiit mikinerusut pillugit § 37 naapertorlugu apeqquteqaammut 2023-067-imut akissut

04-05-2023
Suliap nr.:2023 - 6373
ID nr. 86792170

Asasara Kristian Jeremiassen

Inatsisartut suleriaasianni § 37 naapertorlugu Nunatsinni mittarfiit minnerusut pillugit Naalakkersuisunut apeqquteqaateqarputit. Apeqqutitit uannit akineqartussatut innersuunneqarput. Apeqqutitit matuma kinguliani ataasiakkaarlugit allanneqarput, akissummillu malitseqarlutik.

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
www.naalakkersuisut.gl

Apeqqut 1: Suluusalinnut mittarfiit mikinerusut qaqugu pilersinneqarnissaanut Naalakkersuisut qanoq tullerriaarippat?

Akissut: Tullerriaarinerit UKA2020-mi imm. 27-mi Inatsisartut akuersissutigisaat Naalakkersuisut aallaavigaat. Tullerriaarineri taakkunani allassimavoq, Ittoqqortoormiini Tasiilamilu mittarfiit Naalakkersuisut nangillugit suliarissagaat.

a) Qaqugu illoqarfiit sorliit mittarfiorfingineqarniarpat?

Akissut: Inatsisartut aalajangigassaraat. Ittoqqortoormiini Tasiilamilu mittarfissat pillugit isumassarsiatut siunnersuusiasaanut, Aningaasaqarnermut Akileraartarnermullu Ataatsimiititaliap Naalakkersuisunut 2,0 mio. koruunit aningaasaliissutiginikuuai (ilassutitut aningaasaliissuteqarnissami suliaq nr 22/986) immikkoortinneqarput. Isumassarsiatut siunnersuusiat 2023-p naanerani naammassineqarnissaat naatsorsuutaavoq. Isumassarsiatut siunnersuusiat saniatigut pilersaarutit taakkua nangillugit suliarineqassappata, tamanna Inatsisartut aalajangissavaat.

Apeqqut 2: Ilulissani mittarfik piareerpat atortui atorlugit Qasigiannuani suluusalinnut mittarfimmik naggueqatigut Canada-miik angallannermut piumasaqaataasut malillugit misiliummik Qasigiannuani suluusalinnut mittarfiorortoqarsinnaava?

Akissut: UKA2020-mi imm. 27-p isumaqatigiinniutigineqarnerani allassimavoq, Qasigiannuani mittarfik nangillugu suliarineqassaguni inuiaqatigiit aningaasaqarnerinut imminut akilersinnaassanngitsoq, tamannalu tunuliaqutaralugu Inatsisartut aalajangerput siunnersuut taanna nangillugu suliarineqassanngitsoq.

Taassuma saniatigut suliniutinut kontorpaalunnik pilersitsinissamik taamanikkut Naalakkersuisooqatigiisusut innersuussutigisaat, tassani Tasiilami nutaamik hangariliornissamut aningaasat atorneqartussaammata, Aningaasaqarnermut Akileraartarnermullu Ataatsimiititaliap 2021-mi juunip 25-ani akuersissutigai (ilassutitut aningaasaliissuteqarnissami suliaq nr. 21/936).

Akissuteqarnissamut Mittarfeqarfiit isummersuutissaqarnerisq, Ineqarnermut Attaveqaasersuutinullu Naalakkersuisoqarfiup aamma aperaa. Mittarfeqarfiit oqaatigaa, ICAO-p (Nunat assigiinngitsut akornanni inuit silaannakkut angallaneqarnerinut kattuffiup) malittarisassai Canadap Nunattalu malikkaat. Nunatsinnut malittarisassat Trafikstyrelsimi isumagineqarput, Canadamilu Transport Canadamit isumagineqarlutik. Taamaattumik nunani taakkunani marluusuni mittarfiliornissani, mittarfinnillu ingerlatsinissani piumasaaqatit annertuumik allaanerussuteqassanngillat.

Assinganik ICAO (nunat assigiinngitsut akornanni oqartussat aqutigalugit) timmisartuutiqatigiiffinnut piumasaaqateqarpoq, taakkulu nunat assigiinngitsut akornanni isumannaallisaanermut piumasaaqatit ilaatigut patsisaallutik, imarpik qulaallugu timmisartunik minnerusunik akunnerpaalunni ilaasunik timmisartuussisoqarsinnaanngilaq.

Apeqqu 3: Naggueqatigut Canada-miik suluusalinnut mittarfiit atorlugit sanasimasaat mittarfinnik sanaartornissaq Naalakkersuisut atussallugu isumaliutigivaat?

Akissut: Apeqqu 1-imut 2-mullu akissutit innersuussutigineqarput. Inatsisartut tulleriarinerinut Naalakkersuisut soorunalimi ataqqinnipput.

Neriuppunga qulaani allaqqasuni apeqquteqaatit akineqartut.

Inussiarnersumik inuulluaqqusillunga



Erik Jensen